

嘉靖延平府志

四

K295.72

2

官師志卷之五

名宦

郭顯忠 林揆 鄧光布 曹朋

宋咸 上官基 俞偉 王廷彥

謝濬 張溥 王瓘 郭汝賢

劉正 傅汶 丘之立 陳攄

葉先 彭億 趙公峴 萬諤

林行可 王奎 石慤 董居安

葉堯奠 黃揆 濮垣 連三益

方大琮 王潯 王洪之 宋南強

黃去疾 熊適 趙善佐 趙希佺

黎靖德 劉純 許安仁 朱松

許抗 陳煥 林用中 李綱

貞寶 文殊海涯 劉思禮 陳洪

魯崇仁 金剛奴 王益子 曲惠

劉居信 王克剛 陳善 張可大

張縉

吳信

倪俊

黃采

周政

朱孟常

張登

徐中

錢道寧

歐陽興

王貫

譚明

張泰

鄧槩

陳大經

曹閔

陸嵩

何士麟

彭修

梁觀

張理

劉昂

鍾質

張奉先

楊忠

唐誠

張敏

姚泰

林埜

覃彬

張善教

何昂

張紱 尹時 何海 林鴻

劉季崇 陳仕淵 徐昇 朱導

五代郭顯忠光州固始人僞閩王延政時為鏞州刺

史政尚清簡化民以德民有喪不舉者捐俸賻之歲

歉輒發廩賑貸民不知飢及卒立祠祀之縣志云顯忠履歷皆

有可稱

林揆僞閩王延政時為永順場官南唐保大中陞場

為順昌縣就以為令當干戈相尋之際政尚簡易民

多德之

唐鄧光布字明遠光州固始人智畧絕衆唐乾符初
爲崇安鎮將中和中與攝沙縣令汀州司錄曹朋協
謀徙縣治後黃巢破閩光布率衆禦之誤中流矢而
死沙民立祠祀焉

曹朋字仲謚光州固始人唐中和中以汀州司錄攝
沙縣事與崇安鎮將鄧光布協謀徙縣治于縣沙坡
即今縣治是也有功德於民民多愛之子孫占籍於

沙

宋 宋咸建安人慶曆初知尤溪縣端慎公廉剖決無滯能名冠於一時重建廟學教養有方多士翕然從化邑人林積始以文學登進士寔咸誘掖之力也後守邵武廣學舍置田養士吁江李泰伯紀之

上官基字子固光澤人嘉祐二年進士知將樂縣事時寇吳恂起募邑人廖恩殲焉

俞備字仲寬四明人元祐初知順昌縣初縣民生子

多不舉傭集耆老諭以理貧者許贍以粟所活者不
可勝計多以傭之姓字名之俗婚娶尚侈傭戒以儉
而省浮費民有健訟者反覆開諭悉感謝去縣治前
大溪艱涉傭率富民出資編舟爲梁以濟之復籍廢
寺田數十畝儲租以備繕修爲縣幾兩考木生連理
粟一莖十二穗民歌頌焉

王廷彥字英臣廬陵人元祐間知尤溪縣性明敏力
鋤強悍縣人王象爲郡都吏不輸租廷彥以事謁郡

退郎館呼象至示以斷案杖之廼趨郡庭請罪時守
蕭伯儀因是亦器重焉監司有滯訟疑獄輒委決於
廷彥漕使陳宗按部過境不入留詩拏洋驛云畝田
高下趁春耕野水涓涓照眼明莫道深山最深處人
人解說長官清

謝濬邵武人紹聖間以通直郎知沙縣多善政吏民
悅服嘗捐俸剏平津橋

張溥字道濟開封人紹聖間知尤溪縣曉達吏事創

決如流庭無留訟公餘手不釋書卷嘗取孝欽慈愛
謙遜忠信勤儉五善作文以諭俗

王權字元玉明州人崇寧間知沙縣改宣教郎福建
轉運司主管領縣事歷任歲久多善政時民爲生祠
于太平興國禪寺今寺僧祀以爲土神

郭汝賢字舜卿建安人宣和間以興化軍通判攝沙
縣事治績彰著遂實授知縣廉明簡重吏民懷其德
而畏其威

劉正字道醇候官人建炎間知尤溪縣廉明不阿紹興初建劔寇起正訓練民兵以禦縣境弓手余招酗酒躍馬入隊擾其衆隊長不能止正斬以徇部下肅然未發鄉民林悌鄭郁招集亡命欲爲亂正廉得其情執而戮之民賴以安

傅汶初尉清流捕盜有功改知將樂縣 朝廷以軍興鬻僧責之縣他邑視民產均敷之汶遣吏齎度牒徃三山減直而售官出餘直以足數不擾而辦

立之立字斯行建陽人紹興初知順昌縣廉明仁惠
縣遭寇亂之餘民多困憊之立力撫摩之政先農業
田之荒者借種與牛寬其租限未幾訟息刑簡而民
日阜安

陳攄四明人宋紹興間知將樂縣性敏達仁恕政尚
寬平初邑民貧者生子多不舉攄嚴禁止仍給官錢
周之遇歲歉輒發廩賑貸民賴以存活甚衆歿後懷
其遺惠立祠祀之入國朝春秋祀典

葉先廉州人紹興間以奉議郎知沙縣政尚寬厚嚴
於革奸除害秩滿民德之欲留弗果爲立祠於靈衛
廟

彭億字宋延福州人紹興間知尤溪縣明敏有幹才
嘗徙建縣學增置學田及建縣治隣封盜起民多流
竄億募精兵固守賊不敢犯諸生立祠於學民亦立
祠祀焉

趙公峴字唐卿紹興間知順昌縣廉明勤敏而政尚

寬簡庭無留訟歲歉輒發廩賑貧民不乏食有幸大
者謀竊發愬者踵至公峴陽叱之以爲妄衆皆愕然
密遣擒捕盡獲其黨民有停柩者諭之葬而貧甚不
能舉者則官助其費修學養士文風大變張魏公帥
閩薦于朝遂改秩去

萬諤字叔康饒州人紹興間知沙縣寬厚有惠愛於
民廣寇犯閩境諤被漕檄督餉事賊破浮沅攻圍蘇
源山寨諤慨然率巡檢吳鑄尉陳永忠以鄉豪衆千

餘人逆拒之賊望風退遁追攝逾日履險墮空從者
扶舁取捷徑還治民感其忠義立祠祀焉

林行可三山人紹興間知尤溪縣博學敦行爲縉紳
所重時尤溪政務蠹壞殆不可爲銓曹無肯就注擬
者諸司以行可薦至官修政事辦財計禁苛擾振士
風其政治術業可以歷世遵行

王奎字景文四明人紹興間知順昌縣政尚寬簡心
先愛民不深鞭罰而民畏服焉

石齋字子董會稽人乾道間知尤溪縣始至官吏以財匱請借民租齋不答但日治租籍凡民逃絕而田入見戶及鬻產而不能更其籍者正之又謹視其出納之際而吏不得容其姦闕市之征亦損其數縣學校久廢齋命其友古田林用中來掌教事而增其弟子員親率佐吏賓客往臨之因爲陳說聖賢修己治人之學而講求其義理至當之歸聞者興起異邦之人亦或裹糧就學乃廣學宮買田市書以充入既成

爲考古制舉鄉飲酒禮以落之於是士始知學而民俗亦變遠鄉有據險自豪數十年不輸租賦日與比隣爲仇敵者齒爲榜諭之即斂手聽命民犯罪具獄上府吏以邀求無厭欲致之死訟爭之不聽則請自對獄代民死民乃得免歲大疫多治藥餌遣醫散之村落賴以活者甚衆及代去民畫像祀之

董居安字子安松溪人乾道間知順昌縣清儉如寒士遇事明敏不倦時縣之鹺法更變帑藏空虛吏請

如舊令計民產賃錢謂之綱本居安以爲賦外之歛
不聽優游措畫不煩而辦凡追所逮傳符下里未嘗
一遣公皂至民家先是令以隻日晨興收訟牒居安
無昏昕至則進之冤枉易達訟者多歸詞凡所連逮
吏規以爲利居安推摘一二切要餘無所問民爲立
生祠祀之以丐壽考

葉堯賞字廷瑞崇安人中紹興進士調鄂州遇城尉
以捕獲有功改秩知廣州清遠南劍州將樂茂著治

聲

黃揆字端甫三山人淳熙間知尤溪縣爲人勤敏濟以仁厚時縣承累年弊政之後困匱不支揆理財撫民不爲表暴家給人足而田里相安陞知瓊州民爲立生祠於福星堂以祀之

濮垣淳熙間知尤溪縣廉明有吏才至官當縣凋弊之餘每事振刷自立井井可觀士民頌之

連三益字叔友安溪人慶元二年進士知沙縣爲政

明簡庭無留訟及去民遮留者千數

方大琮開禧初南劍州學教授上官送所昵士拒不
納後爲將樂知縣其教授南劍時封崇羅仲素墓至
是式楊時門廬偕其孫曾欵謁松楸祀八賢于學務
以禮信迪民

王潯字景淵台州人嘉定間知沙縣政尚寬簡一意
愛民而民德其惠嘗捐俸資建石橋開禧初解職去
民思之不置立祠翔鳳橋祀之

王洪之建寧人嘉定間知沙縣廉明不苛吏畏民懷
時稱能吏召拜大理評事

宋南強字子居山東人寓浙之紹興淳祐間知沙縣
治專德化不事刑罰勸農桑興學校繕脩橋梁道路
幾一考解職去民欽其德立甘棠路碑用表去思之
意碑在縣東南感義里

黃去疾邵武人咸淳間知將樂縣剏龜山精廬聚簡
冊政暇與學子講習仍取龜山紀年而訂正之題曰

年譜見行於世

熊適字述之建陽人紹興初爲順昌縣丞明敏絕人而渾然有長厚之德令丘之立適同里人甚相友善適事事與之協濟故當兵亂之後政無不舉而又持已廉待人恕吏服其斷民被其惠時以循吏名

趙善佐字佐卿宋宗室子也天資闡爽庠序有聲學於張宣公朱文公之間究心於易試有司中科爲將樂縣丞廉勤自約奉法愛民不妄費公家一錢干謁

無所應雖有挾而至者不爲動也

趙希佞字安道世業儒開禧初爲沙縣丞以廉稱崇學禮賢爲時推重

黎靖德永嘉人嘉祐間沙縣主簿攝縣事清謹善理繁劇博學能文詞嘗纂集沙縣志

劉純建陽人沙縣主簿持身廉介斷事果決適歲大疫作粥藥救療存活甚衆其死者作大塚瘞之

許安仁字仲山少從蘇軾學詩有聲稱晚以累舉授

官政和間爲順昌尉甚得士民之譽

朱松字喬年徽州婺源人甫冠登進士第宣和間補
尤溪尉性躁多忤物作常齋以自警時承平日久境
內絕桴鼓聲且邑居僻左終歲無將迎松公事之餘
讀書力學無一息少廢子熹生於尉之官舍是爲文

公

許抗字損之南城人宣和間爲沙縣尉時草寇彭孫
嘯聚亡命阻山爲固抗挺身入賊壘說而降之轉運

使陳榮言於朝曰若許抗者可謂能減九重之焦勞
救一方之塗炭擢大理寺評事改知仙遊縣亦有能
聲

陳煥字其華建陽人紹興間爲順昌尉寬和廉靜不
迫不擾邑政賴以裨益者甚多而未嘗自以爲能人
樂其政號曰陳佛子

林用中乾道間教尤溪學博通經史極深性理之學
以餘力爲文詞暢而粹其篤行類鄒魯士民彥率化

而頑傲之徒亦翕然服之

李綱邵武人負天下之望以一身用舍爲社稷生民安危宣和初拜起居舍人既陳時政出監沙縣稅務題咏甚多不以黜謫自阻卒官至宰相謚忠定

定真寶字朝用別號彞齋蒙古人至正三年由政和縣達魚花赤調南平民感其惠作歌頌之曰真彞齋蚤不來田棄稼穡家棄孩天之復從民欲彞齋下車悍吏逐雨風適時歲其熟越二年閩憲使閩閩之學校

五子所不卷之一
各官三之三
弛作養法因檄真寶至閩而以修廢舉墜之任屬之
真寶乃宰蠹孔覈隱田處之有方由是士有所廩而
民亦歡樂之真寶凡歷官數縣律已嚴而待物恕設
施舉措侃然不違乎理故隨其所至民愛之如父母
僚吏敬之如神明而政和之民又相與集錄其治蹟
為書名曰東和善政錄

文殊海涯字貫道南昌人至正間監尤溪縣廉介明
敏時寇難屢作規畫措置悉有方軌平徭簡賦戢奸

抑暴有陳十軍陳合一者素獷悍各聚黨爲亂海涯
捕其渠魁置于法餘黨盡釋之尤重儒雅興學校增
置弟子員凡鄉社俱令立學擇師儒以主教事士民
感德爲立祠于南溪書院以祀之

劉思禮字季和高唐人至順間爲順昌尹廉明公正
疾惡如仇民有親屬因財而訟者以理論之遂悔悟
息爭江西民有偽造鈔者事發妄攀指別郡平民縣
吏乘機詐爲文移追無辜以射利思禮一見印文洞

知其詐人以為神

陳洪至正間尹沙縣為政廉明而濟以寬簡民訟紛
糾剖決無滯久而民自畏服無敢至訟庭者進士曹
道振嘗作平獄頌以美之

魯崇仁字子元蜀郡人至正間為順昌縣尹為政簡
易深得民心先是邑公田最為民病崇仁至因民情
所欲而為之法民亦樂輸而弊自除遇歲歉嚴私糶
之禁仍諭儲粟之家假貸賑飢粟不增價民無匱乏

興學校崇祀事他善政尤多邑人立碑頌德

余剛奴至元間爲尤溪主簿廉慎有幹濟才賑貸饑
荒扶植善良挫抑豪猾政有不便者輒改爲之葺廨
宇剏譙樓功舉而民不知勞

王益子貞元間爲南平主簿持身廉潔以文學飭吏
事士民敬愛之

曲惠字順鄉真定人至正間爲尤溪尉郡守鄭文瑞
重其才擢攝縣事不越月決滯訟六十餘事未幾紅

卷之五
名宦三之五

巾寇亂壓境惠謂其子師善曰臣死忠子死孝大節也吾父子皆食君祿萬一不幸頭以闔門殉乃行保甲編伍之法發常平賑民勸巨室出粟贍兵首倡勇敢拒戰邑賴以全後承間擢率兵抵晉安兵罷死于賊聞者痛悼

國朝

劉居信揚州人洪武初知南平縣事廉慎勤敏

撫恤凋瘵仁意備至凡百建置俱有條理而尤急於興學校振士風清譽聞於列郡

王克剛臨淄人洪武間知將樂縣事持身廉潔爲政
仁明知民疾苦吏不敢欺由是民獲力農漸致富庶
陳善夏邑人洪武間知沙縣事廉勤仁惠捕滅馮谷
保寇黨民獲安息興禮讓重賢良禁奸暴吏不欺而
民悅服

張可大將樂人洪武間知尤溪縣廉明公直遇事條
理不遺先是鄉民頑犷不輸賦稅不供徭役可大示
以約令諭以禍福民始帖然歸順

張縉字文錫澤州人洪武間知順昌縣事蒞任公平
廉恕開渠引水自龍興岩而來以利民田名爲張公
渠

吳信進賢人洪武間知將樂縣公明廉慎政尚寬恕
視民如子尤勤於政務凡所爲酌之以禮而斷之以
義黠吏不得逞其奸均徭減賦民甚德之

倪峻字惟岳無錫人洪武間知沙縣廉靜寡慾好讀
書禁淫祠興學校解宇壇壝莫不一新郡五邑稅糧

先是悉轉輸鎮東衛山民不諳海道舟多覆溺輒責使賠償民甚苦之峻爲疏其狀于朝遂改輸福州衛及延平衛民感其德不忘秩滿陞工科都給事中黃采字宗素蘇州人洪武間由監察御史改知尤溪縣政尚寬恕先是縣用市民拘繫里胥以集事采即釋之示以信義事集民安逃亡者亦皆復業後復召爲監察御史

周政館陶人洪武間知順昌縣平易剛果首興學校

尤重農桑吏不忍欺民甚德之

朱孟常餘姚人永樂間知南平縣性愷悌爲政不尚苛嚴有古循吏風西芹河泊所魚課因業戶廢蕩累歲逋負孟常奏蠲之縣有強寇趙子貴數爲民患構置于法士民悅服如父子然

張登濟南人永樂間知順昌縣公勤廉愛吏民畏服未朞以疾卒于官殯斂之時布衾莫措行裝空匱人所不堪

徐中郵縣人正統間知南平縣慈惠廉明箠楚不施一毫不取諸民甚悅服

錢道寧望江人正統末知順昌縣處事公勤適沙尤寇發率民快備禦保全一邑又於雙峯驛前造舟渡渡民甚德之

歐陽興安福人景泰間知南平縣事性簡靜爲政先德化而後鞭朴有古循吏風幾四載力請致政民留之弗得

王貫南海人由舉人成化初除知南平政尚平直務欲以德化民貧民逋租悉爲規措償之有爭地而交訟於庭者反覆諭以禮義各感愧解仇而去蒞任未幾治聲籍籍著聞俄以疾卒邑民哀之

譚明字重嚴江西龍泉人成化間知將樂縣存心直諒蒞政寬簡時陽源龍蔭二都民強梗不服差役明躬詣其地諭以理法而拊馴之民卒聽命守禦所屯軍陪納屯糧甚以爲病明爲申請上司以錢易米至

本軍民便之

張泰字叔亨廣州順德人登成化二年進士知沙縣
爲人端謹樂易政尚寬平而公庭亦無留事民愛戴
之嘗修飭學校重建先賢祠修建縣治事集而民不
擾公暇輒戾學躬勵諸生學業刻羅豫章陳了齋遺
書以詔學者邑士用勸在任甫三年擢監察御史
鄧槩江西新淦人成化間由進士知永安縣公廉明
斷以十條與民約時庶頑襲鄧寇之餘徃徃逆治槩

乃摘其尤者一人懲以法衆皆畏服久而益敬愛之

凡有追逮不遣公皂惟以一牌木為之付里胥傳置所

逮者家其人捧牌自至無敢或後尤晉心教事增修

學舍每政暇與諸生講論久而忘倦在縣五年事治

民安至今父老思之曰猶憶鄧公也增

陳大經字正之上虞人弘治間由進士知將樂縣公

勤有為好賢重士嘗買地增辟射圃又買田歲祀龜

山之墓卒于官

曹閔字宗孝直隸上海人由進士弘治十一年知沙
縣事公勤廉慎卹衆濟貧興學校去淫祠禁治喪用
浮屠者民多化之十七年擢監察御史民不忍令立
去思碑於接官亭增

陸嵩字如嵩浙江歸安人登弘治壬辰進士除知羅
源縣以才改南平嵩才清而志敏其爲政也務求民
所便剗剔奸弊裁抑冗費有所爲不避也尤工於詩
時和政簡登高吟眺清詞雅句在在流傳時稱以文

五平 乃 卷之十 名宦 三十一
飭吏治者嵩其人焉值歲旱偕守街禱雨龍湫地名雨

立至相與徒步還行驟雨中因疾卒于官民哀之如

喪考妣今祀名宦云增

何士麟廣西蒼梧人進士弘治間知將樂縣士麟廉

而有為三年政成召為刑部主事卒今從祀名宦事關

彭修洪武間任沙縣丞持身廉潔為政務先愛民自

奉甚薄無異布衣時尋陞浙江道監察御史

梁觀增城人永樂間任尤溪縣丞廉直有吏才為政

寬簡不事苛刻心一於愛民民多德之

張理建昌人正統初以賢良舉爲將樂丞持身廉謹蒞政寬平尤精於楷篆書法

劉昇萬州人天順間任南平丞寬惠有幹才持身甚謹遇賢士甚謙扃廟學修壇壝條畫有方而民不告勞在官僅六載力請致仕

鍾質江西永豐人由監生成化間任永安縣丞篤實廉潔有古人風政或不便於民必舉以告令民有玩

法者召至其庭語之曰吾猶貫汝長官不可犯也深
爲知縣鄧槩所重在縣六年力陳致仕民欲白上司
晉之質憮然謂曰吾何德及若而欲苦我於是竟得
請而去歸裝蕭然人至今思之增

張奉先偃師人洪武間任尤溪主簿廉明寬恕黠吏
畏之不敢欺輕刑簡役興學勸士民仰之如父母既
去尤眷眷不忘

楊忠青州人洪武間任南平簿廉靜質直不苟阿同

於人簾衣糲食泊如也尤恤民重士君子以清貧苦節高之

唐誠海鹽人宣德間任順昌簿公勤廉絜滿考百姓相率上疏保畱 朝廷嘉之陞本縣縣丞

張敏徐州人正統間爲尤溪主簿蒞政廉勤存心忠厚沙寇羅丕犯縣敏率衆禦之或以賊勢猖獗戒勿行敏曰吾受命蒞職茲土忍視民患而不救乎吾盡吾職即死無憾遂倡勇而先賊據險與戰兵少力憊

而死民痛惜之

姚泰秦州人天順間南平主簿持身廉介蒞事公平徵科有常愛民如子公私餽遺一毫無所取滿考歸行李蕭然如始至焉

林埜南平人由生員捕盜有功授尤溪簿蒞任有賊首程茶皮聚衆攻殺衆皆患之埜親歷艱難險入巢穴諭以息義諸賊降服捐已資創造學官邑人皆以廉能稱之

覃彬廣西馬平人發身胄監弘治初爲南平主簿剛
明果斷不避權豪遇事敢爲吏民畏服郡守沈榮爲
聯句旌之曰清慎持身與百姓秋毫無犯公勤敏政
以一人數事常兼甫三年懇乞休致而去

張善教瓊山人永樂間任沙縣教諭學行粹潔疑然
以立師道修明職業未踰年士皆從化倡諸生以新
文廟縣父老聞之欣然來助迄底于成

何鼎鄞縣人由舉入成化十七年授南平教諭學優

才愨勤於訓迪在任幾六年卒生徒哀慟至發引日
咸奔送二百里外始返

張紱程鄉人成化間任順昌學教諭學問優長樂引
進士類諸生慕之

尹時字宜之江西永寧人弘治間任順昌學教諭學
行修明教條嚴整師範端嚴畧不以贅禮爲意六載
自陳致仕諸生至今感慕不忘

何海字朝宗廣東番禺人由舉人弘治十三年任沙

縣學教諭持身端謹敷教公勤恩義洽于士心知府
孫侯銜嘉其文行徵修郡志秩滿去任至今士多思
之增

林鴻字子羽三山人以薦起任將樂訓導啓迪有方
多所造就爲人磊落不羈常傲睨烟雲以自適尤好
吟咏允所見聞率於詩發之有唐人風致官至膳部
員外卽有鳴盛集

劉季崇南昌人天順間由鄉舉任將樂儒學訓導優

於學識教條嚴肅循循誨誘不倦諸生中有貧窘者
分俸餘給之

朱蘖浙江山陰人弘治間由舉人任將樂儒學訓導
蘖浙西名族博學敦行以身教人士有貧乏解衣推
食如不及也蘖有女及笄許人治粧就歸兄女貧不
能嫁蘖察知罄以與之無絲毫見於顏色後以陞去
終老於家今祀名宦祠將樂士無間識與不識稱賢
師必曰朱先生子簞簋從子節相繼登進士有賢聲

家教足徵云

增

陳仕淵紹興人永樂間任尤溪巡檢剛毅有膂力尤溪民吳十師寇德化諸縣仕淵謀於耆老葉文禎等率衆往捕之十師就戮餘黨復起勢張甚官兵至懼不敢進仕淵倡勇力戰于羅會場兵敗死焉

徐昇廣信貴溪人將樂守禦千戶所正千戶正統十三年沙寇鄧茂七嘯聚攻城時昇年方十七運籌奮勇率千戶沙瑛百戶王璟翟慶分哨且戰且守賊造

呂公車將越城昇設大木以抵其車又鎔鉄潑其上
以燒之城賴以無虞

宦蹟

廖紀字惟脩江西九江衛人弘治乙丑進士歷工部郎中知延平府紀以嚴明爲治吏畏而民服未一載以憂去

歐陽鐸字崇道江西泰和人正德戊辰進士知延平府鐸才而文其爲政也毀淫祠興學校置田以餼士務振作士習禁民停喪作佛事皆足稱云改知福州府陞廣東提學副使

戴冠字仲鵠河南信陽州人正德戊辰進士冠初仕
爲戶部主事以國用弗充奏裁冗濫激倖者怒謫廣
東新添驛丞居夷數載養充而志定承平再起歷延
平知府簡靜以居不以才華自炫雖不屑屑於吏事
郡亦稱治改知蘇州府陞山東提學副使

鄧尚義字以正湖廣郴州人正德甲戌進士延平府
推官尚義才清而性敏其治獄也是非立見無留滯
亦帖帖合人心見知於當道捧檄以治他獄八閩足

跡殆遍其以制歸也無囊資

田秋字汝力貴州思南人正德甲戌進士延平府推官秋性純而行篤所行務持於正其治獄也期於民不究足稱其職云未二載以憂去

江良貴字汝思江西貴溪人弘治乙丑進士知南平縣良貴才足有爲以縣治窺在西閔外每弗戒於兵燹當橫禁慘慄之際慨然遷舉不避以爲民也召入爲監察御史陞四川按察副使

鄭貴濂廣東歸善人由舉人知南平縣貴濂才足謹
守然政妥而民不擾故今亦稱之陞江西南昌府通
判

黃淑江西廬陵人由監生弘治間南平縣學教諭淑
善教義利頗明尤工詩與邑令陸嵩倡和佳句足稱
焉後以憂去終老於家今士子誦其師必曰淑云

韓源浙江慈谿人由舉人正德九年南平縣學教諭
源謹厚自持師模端重良善是敦不率者化處人不

屑屑於利更能周其急陞南京國子學正出爲長沙
府通判士子至今思之

李熙字師文直隸上元人進士弘治間知將樂縣熙
廉介不屈果敢有爲勤於政治雖權貴不避有廢具
興爲時名吏召入爲監察御史以忤逆瑾除籍再起
今陞江西按察副使

顧昂字仲光直隸吳江人正德丁丑進士知將樂縣
昂性存愷悌治邑有循廉聲召入爲刑部主事

曾確廣東博羅人正德十一年除知尤溪縣尤
溪素號難治確以威治之復濟以息民翕然從之治
賊盜毀淫祠興學校九所行務便於民陞湖州府通
判致仕歸

奉命招捕盜賊諸臣

陳譱 陳旦

宋陳譱字子華候官人登開禧元年進士第累遷宗
正寺丞權工部郎中改倉部員外郎紹定二年冬盜
起閩中帥王居安屬譱提舉四隅保甲譱有親喪辭
之轉運使陳汶提舉常平史彌忠告急于朝謂非譱
莫可平明年以寶章閣直學士起復知南劍州提舉
汀州邵武軍兵甲公事福建路兵馬鈐轄同共措置

招捕盜賊謹籍土民丁壯爲一軍號忠勇沙縣紫雲
基告急沙縣破賊由間道趨城忠勇軍破之於橋賊
乃趨邵武勢益熾時有議當招不當捕者謹言始者
賊僅百計招而不捕養之至千又養之至萬今復養
之將至於無筭求淮西兵五千人可圖萬全詔謹兼
福建招捕使賊急攻汀州淮西帥曾忞中調精兵三
千五百人由泉漳間道入汀擊賊于順昌勝之六月
兵大合加福建提點刑獄七月謹親提兵至沙縣順

昌將樂清流宣化督捕所至克捷自是進攻五賊營
砦平之破潭尾磔賊起之地夷其巢穴誅汀州叛卒
諭降連城七十有二砦汀境皆平四年正月遣將破
下瞿張原砦二月躬往邵武督捕餘寇賊首晏彪迎
降辭以其力屈乃降卒誅之進右文殿修撰依舊提
點刑獄招捕使兼知建寧府累官至觀文殿學士參
知政事知樞密院事以福建安撫大使知福州卒年
八十有三贈少師謚忠肅

陳旦懷安人嘉定中武舉正奏授忠翊郎江州統領

歷知霍丘縣紹定中從陳譚平建邵寇沒於王事今

祠於南劔州愛仰堂真西山先生愛仰堂記祀陳譚王祖忠史彌忠曾武中黃輝趙

以夫無陳巨未詳

奉命勤王都督府諸臣

文天祥 陳龍復 趙時賞 劉泳

呂武 林琦 何時

文天祥德祐二年元兵寇臨安天祥奉使如元軍元

伯顏拘之北去至鎮江亡入真州既而帝降益王即
位于福州天祥遂自温州浮海至行朝除右丞相以
與陳宜中異意不拜乃以爲樞密使同都督諸路軍
馬七月開府南劍州經畧江西募兵得數千遂復邵
武軍十月帥師次于汀州

陳龍復泉州人沉厚有前輩風與文天祥同登第天
祥開府南劍劍遷福建提點刑獄督府參軍給餉治兵
天祥賴之

趙時賞字宗白和州宗室也居太平州咸淳元年擢
進士第累官知宣州旌德縣文天祥開都督府于南
劍州奏辟參議軍士江西招討使數以偏師當一面
戰比有勝時賞風神明俊議論慷慨有策謀尤爲天
祥所知及空坑之敗被執不屈死之

劉洙字淵伯廬陵人文天祥鄰曲也少相狎暱及起
兵辟補宣教郎督府機宜暨天祥出使洙領兵還天
祥歸開府南劍洙校部曲來會改授太府寺簿專將

一軍爲督府親衛會空坑兵敗被執與其仲子同日
死馬季子復從天祥死嶺南當時江西忠義皆沐所
號召沐性沈實而圓機晝夜應酬疊疊不倦云

呂武大平州步卒也文天祥出使武應募從行偕脫
鎮江之難沿淮東走海道賴武力爲多天祥開府南
劍武以武功補官遣之結約州縣起兵相應道阻復
崎嶇數千里即天祥于汀梅挺身患難化賊爲兵以
環衛官將數千人出江西死於橫逆一軍揮涕而墜

延平府志卷之十
各官之三十二
之武忠梗出天性不避強禦而好面折人過多觸忌
諱故及於禍云

林琦閩人也德祐二年大兵既迫臨安琦於赭山結
集忠義數千人捍禦海道以功補宣教郎督府主管
機宜文字充檢院文天祥開府南劍琦佐其幕琦外
文采內忠實數涉患難無怨懟辭及潮州移屯琦俱
被執北行至建康以憂憤死

何時字了翁撫州樂安人天祥同年進士也累官知

與國縣天祥起兵辟署帥府機宜帶行監文思院天祥入衛時任留司分司吉州餼運平江天祥奏時知撫州吉州下時脫身歸鄉里益王立天祥開府南劍時復起兵趨興國接引以時帶監江西提刑

續

巡司

元安禮護世字正鄉汝南人由西臺監察御史來僉福建廉訪司事按臨尤溪時邑民不率政教廉恥道

喪告訐旁午於縣庭奸偽紛紜於案牘爲之上者被
其脅制閉目搥手不敢吐氣如乘虎狼挾蛇虺其可
畏也及正卿使軺入境頓更弊政勉勵學校資訪耆
英問民疾苦去害興利未幾化澆爲醇矣故威惠所
加鄉民畏之如神明愛之如父母刻石以紀其蹟云
時南平主簿王益子爲之記

附

郡名宦祠行實無考者

馬純漕使 吳康 任文薦 何叔澄 邢淙俱教授 按宋

志所載名宦太守通判添差通判教授幾二百餘人志莫考何人所輯草畧殊甚豈以當時歷宦者皆謂之名宦耶此五君子則祀郡之名宦祠者必其聲蹟有過人者矣惜其行實無可考耳載之以俟博覽君子

官師志卷之五

公署志卷之一

我

朝稽古建官郡縣之職布天下然視民治事退食自
公必有高明之堂燕息之所使心氣清寧平夷然後
理達而事成至於兵衛之環衛藩臬之巡守 朝臣
巡使宣上德而達下情雖職有崇卑勳有常暫而公
署之設不可缺一也明矣吾郡若邑蓋自 國初以
迄于今先人之所創建後人之所繕葺自今觀之亦

既完且美矣凡居於是者朝而升焉暮而息焉必思
所以布德勤政以作福於民求無愧焉可也詩曰夙
夜在公在公明明謹於顯也又曰相在爾室尚不愧
於屋漏防於微也顯微一致久暫不殊官職脩而理
道得美於是居也又何愧焉志公署

府

南平
縣附

巡按察院

行
堂

在府之東有正門有儀門有堂有翼廂

有燕居堂有左右房有砌臺有廊

舊為建寧道弘治
四年知府蘇章改

建正德四年燬同
知計宗道重建

布政分司在府之左制視察院殺焉

正統六年知府
王吉建景泰三

年巡撫刑部尚書薛希璉以狹隘割府照磨
解舍以廣之成化十五年知府王範重建

武平道在察院之東制視察院殺焉

舊為按察分司
弘治四年知府

蘇章改為察院五年以府併
邵武府改為武平道易今名

縣

將樂

布政分司在縣之南

正統六年知縣陶俊建弘治
十二年燬知縣李熙重建

武平道在縣之北

洪武七年知縣王克剛建為按察分司為建寧道弘治四年易今名

沙縣

布政分司在縣之東

建置無考

武平道在縣之東

洪武十一年知縣許斌建為建寧道弘治四年易今名

尤溪

布政分司在縣之東

正統六年知縣蕭學敏建十三年寇燬本司參政王化華重建

武平道在縣之西

洪武二年知縣薛昉建為建寧道正統十四年寇燬本司僉事張彥

重建易

今名

順昌

巡按察院在縣之西

舊為武平道正德十五年知縣馬性魯改建

布政分司在縣之西

正統六年知縣高諒建正德十五年知縣馬性魯重建

武平道在布政司之左

正德十四年知縣馬性魯以靈官堂舊址改建

永安

布政分司在縣之北

武平道在布政分司之左

一二司俱景泰五年通判楊李琦建按上五縣建置

之詳各具縣志茲存大都為四縣無巡按察院蓋巡歷少及故規制不備云

正統六年知縣馬性魯改建

府治在城北隅中為集思堂堂之東為經歷司西為
照磨所後為高明堂堂之西北極高為知府宅東為
同知宅推官宅西為通判宅宅之南為照磨宅又南
為經歷宅知事宅檢校宅集思堂之左翼為吏戶禮
房承發司堂之右翼為兵刑工房高明堂之左為架
閣庫右為常豐庫東南為龍亭庫六房之後少南為
吏舍堂之中階為御德碑亭亭之南為儀門門之
左為土神祠右為理刑廳正南為樵樓樓之左偏為

申明亭右偏為旗善亭清軍館督糧廳東西峙

按治舊鹽

倉塲址宋州治在今治東元改本路總管府

國朝

洪武元年以為延平衛署三年知府唐鐸改今地其

中燬建無攷正德四年燬知府朱應登建

十三年譙樓吏廨復燬知府廖紀重建

府署五

將樂一在布政司之左

建置無考

沙縣一在布政司之左

舊在縣治東嘉靖二年知縣何亦尹改淘金峯淫祠立之

加丹飭焉

尤溪一在布政司之右

建置無考

順昌一在縣治之西

正德十五年知縣馬性魯重建

永安一在縣治之東南

嘉靖二年燬知縣姚章重建
○已上府署建置之詳載各

縣志此其
大畧云

儒學

司獄司在府城北隅延平衛之東

洪武九年知府唐鐸建後屢燬末樂

七年知府雷誠正德十
六年同知俞敬迭建

稅課司在府治街南

洪武二年知府唐鐸建後屢燬
末樂十年知府胡欽成化二十

三年知府陳廷璉正德十
三年知府歐陽鐸迭建

豐衍倉在府城東隅

元為大平倉洪武二年知府唐鐸重建改今名舊延平衛末豐

廣積等五倉為厥凡七十宣德三年併歸有司
屢燬所存無幾成化十五年知府王範重建

雜造局在府城西門外

舊在延平衛之右常豐庫之址也
國朝成化四年始置

官十五年知府王範建正德
間知府姜文魁改建今所

陰陽學在府學前

宋治州譙樓中元因之
國朝洪武四年樓北知府唐鐸重建永樂

七年燬學無定居以治元年知府陳廷璉初譙樓學
復寄焉正德十五年樓燬知府歐陽鐸改建今所

醫學在府治前

舊在開平坊宋為惠安局在州譙樓
門內元改惠民局洪武二年徙府治

前二十三年燬通判錢宗禮徙建府治左永樂七年
復燬景泰三年知府胡欽重建於福州門內弘治十

年改建正德十三年燬
知府歐陽鐸改建今所

劍浦驛在府城東南建寧門外大溪之東

洪武初知府唐鐸建

景泰四年知府胡欽弘治七年知府蘇章嘉靖元年知府戴冠迭建

劍浦遞運所在劍浦驛之左

弘治八年知府夏英檄本所大使邊富重建

滄峽遞運所在縣東長安北里

建置無考

河泊所在府城水之東

舊在南平縣西隅洪武十四年戶部差人開辦魚課即舊

鐵局為開辦所尋置今所十六年始設官吏求樂十八年水圯正德十五年知府歐陽鐸改築祠置今所

僧綱司在天寧光孝寺

原书缺页

原书缺页

所在候

官縣

南平縣治在府之東岡中為作新堂堂之左為典史
廳堂之後為廊為燕堂燕堂之東為藏庫後少東為
知縣宅宅有亭衙之東為縣丞宅主簿宅宅之南為
典史宅作新堂之中階為戒石亭兩翼為六房架閣
庫承發舖長司六房之背為吏廨亭之南為儀門門
之東西為承流宣化坊其左偏為土神祠右為獄南
為大門譙樓又南為牧愛坊南平縣治坊樓之左右

為申明旌善二亭西南為分理館

按縣治宋元在延平衛前國朝洪

武初知縣劉居信遷府城外西二里許後屢燬景泰三年知縣劉銘建弗稱成化十五年知縣王佐撤而

新之弘治十一年燬知縣陸嵩重建一新正德戊辰知縣江良貴以治遠城外非便請於朝建今所

儒學

滄峽巡檢司在府城東長安北里

宋為寨國朝洪武元年改為巡檢

司永樂十四年水圯知府雷誠重建正統十三年寇燬後復建

大曆巡檢司在府城西北壽巖里

宋淳祐中建元燬洪武初再設十六

年巡檢劉貴建正統十四年寇燬重建

西岸稅課局在府城西天竺里王臺館舊在長砂下

建末樂十四年水圮知府王彪重建

十三年寇燬知府鄭時徙建今所

茶洋驛在府城東金砂里宋為金砂驛元至正改今名洪武初知縣劉居信建

永樂中水圮宣德初驛丞王叔安

重建正統間寇燬景泰中復建

王臺驛在天竺里宋為站元因之洪武初改今名正統中寇燬重建成化十九年巡按

御史張稷叅議黃澄僉事談俊知府王範議檄縣丞鄭賢易民地廣其基重建悉備

大橫驛在府城東汾常里洪武初提領程日新建正統間寇燬景泰間驛丞馮

清重建○提領宋元站官名也國朝初置未定暫因之

預備倉五東倉二一在府城豐衍倉之東一在縣東

南壽山里西倉在縣西劍津里舊在長沙下里後遷今所南倉在

縣南普安里北倉在縣西北峽陽里上四倉俱永樂五年知縣朱孟

常翔西北二倉正統十三年燬景泰四年知縣劉銘重建

養濟院在府城東隅宋在城西關外舊貢院後山之巔紹興二年郡守呂行已徙今

所洪武三年知府唐鐸重建

教場在府城南知縣魏朝端建

急遞舖二十有六

總舖

在府治前 坵墩

在演仙下里

高桐

在仁州里

大橫

在汾城常里 東

倪坑

安濟

上二舖在崇福里

橘溪

在遷喬里

金砂

茶洋

白

砂

上三舖在金砂里

龍源

清風

武步

上三舖在長安北里

嶮峽

長

里

秋竹

在羅源里

西芹

發行

沙溪

上三舖在長砂上里

吳坑

王臺

上二舖在天竺里

樟槎

篔簹

上二舖在資福里

三連

在建興里

白

塔

在大源內里

康隔

在開平里

冷舖

一舖在城內 所蓄滅火之具於其中夜則輪流守宿以備

緩急即古水舖之制今則兼警防盜賊云

漏澤園四一在縣治東演仙下里一在縣治西劍津里一在

縣治南崇福里一在縣治北演仙下里成化二年知府鄭時勅弘治十三年知縣

陸嵩重
新勅建

將樂縣治在含雲山左麓中有正堂扁曰三事堂之西有

幕廳左有藏庫儀仗庫後有廊有後堂扁曰清心有知縣

宅正堂之中階有戒石亭東有縣丞宅西有主簿宅

西之南有典史宅兩翼有六房承發舖長附馬六房

之後有吏廨南有儀門門之東有土神廟西有獄又

南有譙樓大門申明旌善二亭在門之左右按縣為宋舊治

元因之 國朝洪武三年知縣司明重建後知縣蔣珉姚增陳大經李熙各增建脩綉焉

儒學

萬安寨巡檢司在縣北萬安上都宋元豐為寨洪武六年知縣申文彛

建後寇燬弘治五年巡檢黃柔重建知縣陳大經畢成之

稅課局在縣治之左正德四年裁革

萬安稅課局在縣北萬安上都洪武六年知縣申文彛建後燬弘治五年

知縣陳大經重建正德十三年併入在城原革稅課局視事焉

陰陽學

弘治十年知縣李熙建於儀門外之左

醫學在縣前惠民藥局

洪武初知縣司明建後燬知縣李熙徙建於儀門外

三華驛在縣治右

舊為站元至正二十二年提領許子美重建後燬知縣李熙何士麟

以次
初建

白蓮驛在縣東南池湖都舊將安館址

元至正為站洪武改

為驛寇燬景泰三年驛丞洪振重建弘治七年知縣陳大經闢地建置未畢知縣李熙成之

河泊所在縣治前

嘉靖二年裁革

僧會司在含雲寺

道會司在祐聖院

廣豐倉在縣治之左

舊為常平倉元至正建國朝因之改廣豐倉成化弘治間兩

燬知縣陳大經李熙重建

預備倉四東倉在縣治後山之麓

知縣李熙建

西倉在永

吉都南倉在永康都北倉在萬安上都

並知縣金瓚建

養濟院在縣治道南橋之南

弘治六年知縣陳大經重建

張源公館在縣西張源都

弘治四年僉事楊廷貴命知縣金禎建

黃坑公館在縣東高灘都

弘治十七年知縣何士麟建

卷之二
三

急遞舖十有八

總舖在縣治前 莒峽在龍池都 孔山在積善都 懿安在富谷都 高灘 黃

坑上二舖在高灘都 桃源在龍池都 蛟湖在蛟湖都 郭公在永康都 裏灣在勝都

都勝都 隔嶺在龍安都 將安在龍安都 大里 盖竹 舊場 鐵嶺

上四舖在大里都 龍湖 興善上二舖在興善都

冷舖

漏澤園在縣治北二里許成化元年知縣姚曾初置十五年知縣譚明建

坊於前

將樂守禦千戶所在縣治南中為正堂後有牙廊有

後堂左為旗纛廟右為吏目廳東西兩翼列百戶所

十前有門門之偏為鎮撫廳按所洪武四年千戶李濟建成化十年燬十七

年千戶徐壽重建
○直隸行都司

倉在所前之右弘治十年千戶徐吉建以積勸借稍穀

軍器庫在旗纛廟左

軍器局在縣北隅正統間燬弘治十七年重建

教場在縣治西南

屯田九所共田地八十頃四十三畝歲役旗軍百有

五十四人

田在福州府古田羅源寧德三縣

沙縣在鳳崗山之南中為正堂堂之右為藏庫左為
幕廳後為廊廊後為後堂後堂之左為架閣庫右為
儀仗庫後為知縣宅宅之東為縣丞宅西為主簿宅
典史宅在縣丞宅之前正堂之兩翼為六房承發舖
長二司吏廨在其後中階為戒石亭亭南為儀門門
外之東西為土神廟為獄又南為譙樓為正門門之

左右為旌善亭申明亭

唐治在沙源縣令曹明崇安鎮將鄧光布以其地阻溪建

今所宋元因之

國朝洪武二年知縣陳善重建後

屢燬永樂元年知縣倪俊景泰元年知縣余寬成化

五年知縣張泰弘治十二年知縣

曹閔嘉靖元年知縣何亦尹迭建

儒學

北鄉寨巡檢司在縣北十七都

宋元豐為寨洪武八年改為巡檢司巡檢

馬中

稅課局在縣治南翔鳳橋之西

陰陽學在縣治之左

醫學在縣治之右

二學嘉靖二年知縣何亦尹建

河泊所在縣治東

洪武十五年知縣許斌建正德十四年裁革

僧會司在天王寺

道會司在東嶽行祠

新豐倉在縣治東

舊名濟留正統間寇燬景泰元年知縣余寬重砌改名

預備倉三東倉在縣東南八都南倉在縣南八都琅

口北倉在縣東

俱正統十三年燬于寇

養濟院在縣南翔鳳橋之東

為間十四〇正德九年知縣徐瓚建

教場

急遞舖八

總舖

在縣治東

琅口

在八都

高砂

在五都

館前

在二都

青洲

在一都

洋口

在二十都

尾歷

在二十都

荆村

在二十都

冷舖

漏澤園在縣治東北邑厲壇之左

尤溪縣治在武平道之東中為正堂堂之右為幕廳

左為藏庫前為儀仗庫後為廊為燕居堂又後為知

縣宅宅之東為主簿宅東廊之後為縣丞宅典史宅

西廊之後為吏廨正堂之左右列為六房架閣庫承

發舖長二司附焉中之階為戒石亭亭南為儀門門

之左右為土神祠為縣獄又南為譙樓為大門門之

外申明旌善亭左右置焉按治宋紹興知縣宋咸建國朝洪武三年知縣薛昉

重建後爨燬於兵知縣張可大牛義黃采周輒陳孝軻相繼脩剏而知縣杜宥孫珏唐綸曾確每因廢建

置功居多云

儒學

英果寨巡檢司在縣西七都宋元豐建元至正間徙四十都國朝洪武四

年巡檢朱德亮復之正統十三年寇燬重建今復燬於火

高才坂巡檢司在縣西二十九都舊在三十都洪武四年巡檢王有成

建正統十三年寇燬鼓樓孑然獨存正德十六年知縣曾確遷建今所

稅課局在縣東積善坊元為稅務國朝洪武初改今名後燬景泰間大使江子

旺即舊址結草屋行稅正德四年裁其官而課鈔如故云

陰陽學在縣儀門之旁

醫學在縣治左舊惠民藥局正德六年知縣諸弘濟復建惠民藥局于

縣東

河泊所在縣治東

宣德中裁縣領其課如額

僧會司在保安寺

道會司在東嶽行宮

濟留倉在縣治西

洪武二年初在縣東因寇廢遂徙今所

預備倉四福星倉在縣治南乘駟坊

舊福星堂

仕陽倉在

縣西四十都巷口倉在縣南二十八都

浮流坂

雍口倉

在縣東十五都

義倉

嘉靖元年知縣曾確立蓋用勸收稅契銀糴米分撥各都置倉收貯推選信實之人為社長以

掌以放賑貸貧民每年大熟取息二分小熟一分荒歉特豐年徵本還官民以為惠確去地方有警盡追

原糴本還官應

用倉厥今曠

養濟院在縣溪南

為間二十有一○舊在縣東正德十四年知縣曾確徙今所

教場在縣治東門內

舊在西關外嘉靖二年遷今所

丹溪公館在十二都

按縣去府治百四十里俱無驛日力不足故建館上司臨治者

息於茲焉弘治十三年知縣方溥建

急遞舖六

三
五
十
二
一
二
三
四
五
六
七
八
九
十
十一
十二
十三
十四
十五
十六
十七
十八
十九
二十

總舖

在縣治左馬坪

在縣九都

白蓮

在縣十都

丹溪

在縣十都

渚

頭

在縣五都茅溪

在縣四都

順昌縣治在儒學之西正堂曰親民堂堂之左右為

藏庫又左為儀仗庫又右為典史廳堂之後為後堂

後堂之後為知縣宅右為縣丞宅宅之南為主簿宅

典史宅正堂之東西兩翼為六房附以架閣庫承發

舖長司儀仗庫之東南為吏解堂之中階為戒石亭

亭之南為儀門門之南為譙樓大門縣獄在大門內

之右門之前翼為申明亭旌善亭

按南唐升未順場為縣治即今地也

宋建炎紹興間俱重建

國朝洪武三年縣丞楊惟

德復建後屢燬十年知縣周政景泰三年知縣錢道

寧成化十一年知縣程摺十九年知縣馮子昌二十

年縣丞蔣時萬相繼躬建正德十四年知縣馬性魯

重建一新

蔚改觀焉

儒學

仁壽巡檢司在縣西北仁壽都

宋為寨國朝洪武初改弘治十四年知

縣李震

重建

稅課局在縣西

宋為務國朝洪武初改九年知縣周政重建正德八年知縣袁黜復建

仁壽稅課局在仁壽都

洪武九年設未置官縣領其課如額

陰陽學

宋治譙樓縣馬性魯毀鎮基廟立焉

國朝因之知

醫學在縣治東

知縣馬性魯重建

雙峰驛在縣治西

宋時為順興驛又為行衙國朝洪武初改知縣周政建正德十四

年燬知縣馬性魯重建

富屯驛在縣治西富屯都

洪武十年知縣周政建正德三年燬驛丞蔡景

重建

河泊所在縣西

洪武十四年戶部差官開辦魚課知縣胡乾建

仁壽河泊所在仁壽都洪武十四年置今缺
官其課縣領如額

僧會司在正識寺

道會司在東嶽行宮

濟留倉在縣治之西宋為常平元知縣魯崇仁建
國朝因之改今名

預備倉四東倉在縣治東名宦祠左舊在縣治西
正德十五年

知縣馬性魯南倉在交溪鄉靖安
西倉在招仁鄉

改建今所北倉在順陽鄉仁壽

養濟院在縣治北為間四十〇正德八年
知縣袁黜遷今所

惠民藥局在縣治前

教場在縣治東安門外

弘治十七年知縣李震建

公館在縣治西北

知縣馬性魯毀淫祠建

急遞舖十有八

總舖

在謙樓西

城南

在水南都

郭間

石溪

上二舖在石溪都

桂嶺

陳坂

杜源

上三舖在靖安都

婁杉

在婁杉都

高沙

在驛站都

吉舟

在吉

石湖

在石湖都

順谿

在苜口都

白石

在大幹都

富屯

在富屯都

太平

在

溪

陽坊

在壽榮都

仁和

在仁壽都

富實

在杉溪都

都

冷舖

叢塚庵在縣治西北赤嶺之左

永安縣治在儒學西中為正堂左幕廳右庫截後而穿廊而燕堂燕堂之右為儀仗庫後為知縣宅縣丞宅處其東主簿宅處其西典史宅幕廳之左堂之兩翼列架閣庫吏戶禮兵刑工承發舖長房戒石碑亭建于甬道中前而儀門門外左設廳右縣獄又前而大門譙樓在焉申明旌善二亭樓前分峙

按縣治舊浮流巡檢

司址也景泰三年立四年知縣韓隆始
有建置嘉靖四年知縣姚章加脩飭焉

儒學

安沙鎮巡檢司在縣西三十二都

舊為浮流鎮巡檢司宋元祐五年建

為浮流寨 國朝景泰三年以其地為本縣治所遂徙于此改今名

湖口巡檢司在縣南三十都

未安連城龍巖三縣接界處也正統五年

始建

稅課局在縣治之西

陰陽學在縣治東南府館之左

醫學在縣治東

僧會司

道會司

浮流倉在縣治北

預備倉四東倉在縣治東

景泰三年建

西倉在縣西

十三

一都南倉在縣南

二十都北倉在縣北

二十六都固發口
舊沙縣西倉也

養濟院在縣治東

景泰五年建

貢川公館在二十六都

忠山公館在二十五都

急遞舖五

總舖

在縣治東

黃坊

在二十

貢川

在二十

張關

新嶺

舖二

在二十

五都

永安千戶所在縣治東北中為正堂後有後堂有旗

燾廟吏目廳居堂之左鎮撫司居堂之右前而兩翼

十百戶所列焉又前為門

按所舊隸邵武衛景泰初調守永安

軍器庫在旗燾廟之左

軍器局在縣治之東

軍營後

教場在縣治北門外

屯田二所共三十七頃十有九畝七分歲後旗軍一

百一十二人

一所在御武縣
一所在建寧縣

公署志卷之一

學校志卷之一

三代之學夏曰校殷曰序周曰庠皆所以明人倫也
周禮太司徒之職以鄉三物教萬民而賓興之一曰
六德二曰六行三曰六藝夫今之學猶古之學也學
有師日有餼月有廩歲有貢三年比而舉之法備於
古矣法益備政益弛人才益下嗚呼是豈才之罪哉
夫古教民之法具載周禮炳炳也師不以是爲教士
子不以是爲學羣居終日惟誦習之爲人或以才責

之廼委曰今非昔若也豈誠然乎哉今學校布天下
聖天子求才之意甚切吾延又爲宋先賢倡道之地
典刑具在可師可仰爲師爲士子者當知所以自勵
求無負焉可也志學校

府儒學在郡治後西山之巔中爲明倫堂堂之兩翼
東爲志道齋爲依仁齋西爲據德齋爲游藝齋堂之
南爲泮宮坊坊之南爲泮池池之南爲毓秀門堂之
西少北爲尊經閣堂之後爲饌堂饌堂之左右爲樂

器庫爲祭器庫爲神厨爲宰牲房堂之東北爲教授

宅訓導宅四東西列堂之左爲廩倉堂之右爲內號

復有外號在極高明路迤西北行爲講堂復轉西南

面文峰之麓爲極高明堂堂之前爲大門門之前有

國家元氣坊嘉靖三年知府陳能建

大成殿在明倫堂之西殿之東西翼爲兩廡殿之後

左右爲鄉賢祠爲名宦祠殿之南爲戟門門之南爲

櫺星門宋天聖三年守曹脩古始建元祐間守王汝舟廊六之建炎四年燬紹興二年守劉子翼

卷之二

徙建于郡西龍津館守路採鄭椿年以近市隘且巽
 復舊所嘉定以後守陳宓教授揭祐民守文富唐鐸
 方偉王彪相繼脩改成化九年知府盛顯多所改拓
 其後知府劉侃王範蘇章孫衍相繼修建而同知丁
 隆通判羅環教授徐彰遷普通寺以廣學基正德十
 五年知府歐陽鐸改門西南向周垣廊廡脩飭一新
 今知府陳能增置內號二
 十餘間士誦習有定居云

南平縣儒學在府城西門外中為明倫堂堂階之東
 為居仁齋西為由義齋兩齋之南各聯以號舍堂之
 左為講堂右為饌堂東南為教諭宅又南為正門門
 內有綱常門第光岳精華二坊訓導宅三在門之

東一在門街之南倉在西號之南

大成殿在明倫堂之南殿之東西為兩廡殿之南為

戟門戟門之南為櫺星門舊在府城西關外宋熙寧間建於舊縣治西元因之

國朝洪武三年知縣劉居信徙建虎頭山之麓舊三皇廟故址即今所也十六年縣丞羅南山教諭彭秉

德廓大之宣德七年燬知府雷誠重建正統元年復燬知縣胡濱重建十三年寇燬殿堂兩齋獨存知縣

劉銘修建十一年復燬知縣陸嵩請于知府孫衍達于巡按御史胡華叅政俞俊僉事富珙檄嵩偕教諭

黃淑督建規模宏偉視昔有加焉

將樂縣儒學在縣治東南中設明倫堂堂前之左右

爲兩齋堂之後爲崇文樓堂之東西爲號房一十間九間堂

之南爲泮池教諭宅在堂之左樓之左爲訓導宅二

樓之右爲廩倉饌堂牲房神厨悉備大門在櫺星門

之左

大成殿在明倫堂之右殿之東西爲兩廡殿之南爲

戟門門之左爲興文祠右爲祭器庫又南爲櫺星門

門左有科貢題名碑弘治間訓導朱道立○宋初建

下卞山之麓元至正間徙今所 國朝洪武元年燬

教諭王文通葺建知縣申文彛王克剛相繼克拓增

飭正統十二年訓導王昌順建崇文樓成化二十一年

年巡按御史劉信檄義官白嵩重建後知縣金禎陳
大經因時修飭弘治十二年燬知縣李熙漸次營建
嘉靖三年復燬知
縣劉模經始建立

沙縣儒學在縣治東中有明倫堂堂之前東西有兩
齋左有廩倉倉之前有饌堂右而南有教諭宅號舍
神厨宰牲房悉備訓導宅二處戟門之東西書籍祭
器庫在戟門前之右路出西南為大門

大成殿在明倫堂之南殿之前東西列兩廡南有戟
門門之左右有鄉賢名宦祠又前有櫺星門舊在和
仁坊宋

慶曆二年令杜京徙今所宜和七年令郭汝賢重修
淳祐開慶元至正間令段震午徐銓孫各相繼建造
不一洪武初重建永樂七年知縣鄭恕教諭張善教
謀撤而新之十三年寇燬景泰元年刑部尚書薛希
璉檄知縣余亮重建三年訓導周復白于當道市民
地拓其址成化五年燬知縣張泰重建弘治六年典
史吳信重建十二年知縣曹閔修葺

尤溪縣儒學在縣治東北隅明倫堂居其中兩齋列
堂之翼教諭宅處堂之後訓導宅二儀門屏堂之前
號舍列兩齋之下饌堂比於教諭宅廩倉書籍器
庫牲房神厨皆有所大門在櫺星門之左

大成殿居明倫堂之南兩廡列殿之東西南為戟門

又南為泮池又南為櫺星門宋慶曆二年建縣治西四年令宋咸改治東南

隅紹興十一年燬令彭億徙今所元更造不一國朝宣德二年知縣施泰重建正統十三年寇燬叅政

王仕華按察使楊珏僉事張彥劉子肅同知程嵩俱各建立添造正德十三年知縣曾確教諭丘振毀學

前後淫祠拓克而修飭之規制愈備

順昌縣儒學在縣治西中有明倫堂堂之兩翼有兩

齋南有儀門西有教諭宅宅之偏有倉有沂水亭前

有訓導宅二堂之左兩齋之下偏有內外號二十堂四楹

之後有饌堂儀門之東有庫房神厨南有大門

大成殿在明倫堂之左殿之左右有兩廡南有戟門

門之南有泮池有櫺星門此宋舊基也元豐皇祐間改建縣東國朝洪武十

年知縣周政重建正統十三年寇濶知縣錢道寧通判楊季琦宋璽以次脩建弘治三年知縣費誠拓地

改建正德改元以邑人副使廖中議即今挹秀書院舊學址為之於是教諭陳果率諸生白于督學副使

杭濟巡按御史饒禧檄通判羅環改建今所

永安縣儒學在縣治東內建明倫堂堂之前東西為

兩齋居仁由義教諭宅處東南訓導宅二左右列後曰尊

列五府志卷之二十三 學校五

經閣閣之下為饌堂兩齋之下為厨庫號舍路迤而東有宰牲房直而南為大門

大成殿在明倫堂之前兩翼為東西廡前曰戟門前

而南曰泮池又南曰櫺星門景泰五年通判楊季琦知縣韓隆和建天順以

後縣丞宋善知縣劉忠器鄧榮劉榮相繼重修弘治壬戌燬劉榮重建

府學生四十人增廣生四十人附學生不限以數今

二十有四人

南平縣學生二十人增廣生二十人附學生不限以

延平府志卷之十一
學校
數今二十有九人

將樂縣學生二十人增廣生二十人附學生不限以
數今六十有三人

沙縣學生二十人增廣生二十人附學生不限以數
今二十有七人

尤溪縣學生二十人增廣生二十人附學生不限以
數今二十有七人

順昌縣學生二十人增廣生二十人附學生不限以

數今二十有六人

永安縣學生二十人增廣生二十人附學生不限以
數今四十有四人

御製書六縣同於府

洪武正韻十有六卷

大誥三編

大明律 卷

諸司職掌 卷

爲善陰騭書十卷

孝順事實書十卷

易二十有四卷

書十卷

詩二十卷

春秋三十有九卷

禮記三十卷

大學一卷

論語二十卷

中庸一卷

孟子十有四卷

性理書七十卷

五倫書六十有四卷

御製卧碑六縣同於府

學規六縣同於府

祀事南平附於府將樂沙尤溪順昌永安縣學祭與

府同有祭器而無樂

祭器

登五

鉶二十

簠四十四

簋四十四

籩一百八十八

豆一百八十八

爵一百九十三

筐九

俎二

犧罇一

象罇一

雲雷罇一

酒罇二

祝板并架一

勺

幕

毛血盤

香爐

燭臺

大方盤

小方盤

方燈

香盒

大香案

小香案

酒鐏案

爵帛案

牲卓

焚祝帛爐架

糝盆

盥盆

腕巾

樂器

軒懸之樂

鍾十六

磬十六

琴

瑟

琴 尺 卷 之 二
卷 之 九

簫

笛

篪

排簫二

笙

塤

應鼓一

搏拊二

祝

敔

節樂之器

麾幡一

佾舞之器

節二

翟六十四

籥六十四

鄉飲六縣同於府

射圃

府學在府城西關之外

舊在文廟之西洪武十一年

改建於府城南山川壇之傍成化間知府王範復移
建於帝師廟廢址弘治間知府蘇章又移建今所

南平附府學

將樂在水南都

舊於縣南山川壇前景泰元年徙
建城隍廟後弘治七年知縣陳大經

復徙今所空閑官地仍買民地以
廣其基 建廳堂大門繚以周垣

沙縣在縣之西

弘治八年主簿徐縉移
建於本學戟門之東

尤溪在學之東

順昌在縣治之東

正德八年知縣表黜建亭三植

永安在縣治北門外二里許

教場之東

射器

弓五

矢四十

侯一

之一

翻旌一

楅一

決一

拾一

鹿中一

籌一

朴一

豐一

觶一

勺一

壺一

篚一

洗一

壘一

尊一

斯禁一

樂器

瑟一
琴一
笙一
簫磬一
鍾一

鞀一

將樂沙尤溪順昌永安五縣射器同於府

學田

府學計稅米九石六斗六升
小南峯通聖堂稅米共七石九斗八升壽峯堂

稅米一石伏虎庵田無苗米歲收田租六十石真人堂稅米六斗八升

南平計稅米六石一升
福成寺稅米四石一升天妃宮稅米二石正

將樂關

沙縣計稅米六石有奇

義恩寺普度堂田

尤溪計田百有二十畝

保安寺田一百四畝七分
羅漢寺田一十五畝三分

順昌計稅米六石

朝真堂苗米六石

永安闕

論曰古學無田今學有田古士無養今士有養養士以田考自宋始 國朝因之夫士貴養其內而不養其外養以義而不養以利養士以田養其外者也幾乎利矣上下之間廼或有遺議焉良有司立法之美

意其端豈然哉善夫太史氏舒子芬之言曰田井學
校本相關千古何人識治端今日爲儒無別事希顏
只在忍飢寒

題名碑六縣同於府

社學

南平四所招福坊一 開平坊一 紫芝嶺坊一

畫錦坊一

正德十五年知府歐陽鐸建

將樂七十所在城四隅各三 黃潭都三 水南二

都各四 玉華等二十三都各二 積善等二十一

都各一

沙縣五所在城四 尾歷一

尤溪四所在城二 水東一 水南一

順昌二所東隅一 曰養 西隅一 曰養正正德十六年知縣馬性魯建

永安四所在城二 貢川一 安砂一 義齋 在縣治西

二十七都。按此齋永樂間舉人賴福建以教鄉都子弟亦社學類也今附于此

書院

延平書院在府城南九峰山之麓中有祠祀李文靖

公左右翼以廊廡前而南有門宋嘉定二年郡守陳

從彥李侗朱熹四賢講道之鄉因做白鹿洞規式建

書院為奉祠講學之地院有禮殿以祀先聖先師

有祠堂以祀四賢又及周張二程廖德明黃榦諸賢

聘九江蔡念成為堂長延弘齋李燾定學規捐俸市

田以贍生徒其後郡守傳康陳韓又有建置端平間

勅賜延平書院額有閣有堂齋有濯纓聞復光風霽
月亭有風雩橋後圯壞郡守董洪修復元末燬于寇
國朝知府俞廷芳始建堂專祀李侗僉事匡顯為橫
翠樓及亭橋漸復舊規正統復燬于寇景泰間僉事
李顯通判楊季琦監察御史倪敬重修今院揭舊延
平書院扁

延平府志卷一

學文一三

道南書院在府治北山之半中有堂以祠宋儒楊龜

山先生正德十五年知府歐陽鐸改淫祠北山堂而立

豫章書院在府城西門外中有正堂為問前有春風

發物亭東西有書舍南有會講堂又前而南為門正德

十二年知府姜文魁改舊城隍廟而立以祀宋儒羅豫章先生且以密邇邑庠因為諸生肄業之所功未

畢以陞任去知府廖紀歐陽鐸相繼成之嘉靖元年

僉事吳昂改為道南祠祀楊龜山羅豫章李延平云

文公書院在府城龍山道南祠之左有堂有門有書

舍庖福之所而周以垣正德十五年知府歐陽鐸建

街山書院在府城西門外正德十五年知府歐陽鐸改淫祠求寧廟而立以祀

宋黃裳

九龍書院在南平縣東南長安北里中有禮殿以奉

先聖四配十哲像有祠堂祀楊時羅從彥李侗朱熹

四先生按院始建無攷相傳其地蓋四先生舊講道之所也 國朝宣德中殿堂傾圮聖賢像遷

祀本縣儒學門額故址猶存 嘉靖四年叅政蔡朝重建

兩吳書院在南平縣治東南普安里正德十五年知府歐陽鐸改淫

祠大帝廟而立以祀 宋吳儀吳熙二先生

龜山書院在將樂縣治北封山之麓中有祠堂後有

傳心堂門垣廂舍悉備宋咸淳二年尚書馬初心奏

郡倅母逢辰縣尹郭野仙普華國朝知縣王克剛

都御史滕昭副使何喬新憲僉富玠知縣李熙相繼

修建給廢寺田以供祀事嘉靖三年御史簡霄按邑

改祠後立雪堂為傳心堂增祀二程先生仍給祭田

而為之

記云

諫議書院在沙縣治西勸忠坊宋陳瓘嘗贈諫議大夫故名亦名了齋書

院嘉定二年郡守徐景瞻即瓘故居建書院祀之蓋

表其忠義以教邑人也元季寇燬遺址入於居民

國朝末樂二年知縣倪峻復其

池重建有司歲以春秋致祭

豫章書院在沙縣洞天巖之西麓

元至正元年宋儒羅從彥五世族孫

天澤邦建以奉祀事因學者稱從彥曰豫章先生故名國朝洪武三十年縣丞劉文仲重建正統間寇

燬景泰間重建有司歲以春秋祀之

鳳岡書院在沙縣溪南鳳凰山下

宋淳熙十年邑人黃顯建中為講堂

痛曰麗澤後建閣二一繪先聖先師及周程諸儒像一以藏書曰尊經生徒肄業齋舍凡十有二別有游

息之圃亭閣十餘所宋末兵燬

南溪書院在尤溪縣洽南中有二堂左堂為問五以

祀文公先生右堂三楹以祀常齋先生各有翼廂有

門垣文公祠前有展禮亭亭之前有半畝方塘架橋

其上而覆以亭扁曰活水云按宋朱松為縣尉時寓鄭氏此即鄭氏故居而

文公寔生焉嘉熙元年縣令李修建祠以祀松及熹堂齋門廊悉備德祐元年勅賜南溪書院額元至正

間闕僉憲趙承禧以父子同祀於禮未安乃命監縣文殊海涯分立二祠國朝以來知縣汪誠雷殷御

史許仕達通判楊季琦相繼重建弘治四年大學生林海奏允勅有司歲以九月望日致祭後知縣方

溥以祠宇卑隘弗稱請于知府孫銜改作今院規制始備且二祠並向而異門墻則外不失其序而內各

得以全其所尊也

二賢書院在順昌縣治西中有正堂五植祀廖高峰槎

溪二先生堂之東西有翼廂後為寢廳右為園前而

南為門

按順昌舊有雙峯書院以祀楊龜山廖剛朱文公廖德明四先生後又增祀羅仲素李廷

平為六賢書院正德十五年知縣馬性魯毀資勝寺而改建焉易為今院止祀二廖仍給田命其孫光祖

以奉祀事云

先賢書院在永安縣治北門外二里而近中為正堂

祀楊龜山羅豫章李延平朱文公四先生堂之後

有寢廳前有坊揭今院額

按院即故康王廟也規模壯麗山水奇秀正德十五

年例革淫祠知縣羅珊以四賢祠在學官之左甲隘弗稱議改祀焉乃達上司得請遂遷今所

卷之三

三